



Komunikadu Imprensa
Tribunál Distritál Oe-Cusse
14 Dezembru 2017

JSMP husu Prokuradór tenke pro-ativu atu avalia faktu foun sira ne'ebé prodús durante produsaun ba prova no asegura protesauun ba interesadu-sira

Iha 10 Outubru 2017, Tribunal Distrital Oe-Cusse prezide julgamentu leitura sentensa ba kazu krime ofensa ba integridade fizika simples ho natureza violénsia doméstika ne'ebé envolve arguida RL hasoru nia laen. Iha julgamentu ne'e Tribunál absolve arguida tanba konsidera arguida nia aktu nu'udar lejítima defeza.

Absolvisauun ne'e bazeia ba deklarasaun arguida, ne'ebé reforsa rasik husi lezadu, katak iha momentu ne'eba lezadu mak buti no hanehan arguida nia kakorok wainhira arguida toba hela. Nune'e, arguida tata lezadu nia kabun sorin karuk atu defende-an, maibé lezadu la husik arguida. Arguida kontinua buka esforsu atu defende nia-an, no arguida lamas atu buka ai maibé la hetan no hetan fali katana ida. Arguida kaer katana ne'e hodi ko'a lezadu nia tilun-hun ho intensaun atu lezadu bele husik nia liman no ikus-mai lezadu husik duni nia kakorok.

“Iha kazu sira hanesan ne'e Prokuradór tenke pro-ativu atu avalia faktu hirak ne'ebé prodús durante julgamentu no asegura katak ema ne'ebé komete krime tenke investiga no simu responsabilidade tuir krime ne'ebé nia komete”, dehan Diretór Ezekutivu JSMP, Luis de Oliveira Sampaio.

JSMP konsidera katak Prokuradór falla atu kaer-hetan faktu ne'ebé hatudu katak arguida mak nu'udar vítima iha kazu ne'e. Tuir loloos, Prokuradór tenke analiza katak lezadu ninia hahalok mak bele hamosu perigu ba arguida nia vida. Faktu hirak ne'e konfirma liután durante prosesu produsaun ba prova ne'ebé lezadu rasik rekoñese katak nia mak buti uluk arguida nia kakorok.

Ita bele imajina sé iha momentu ne'eba mak arguida la hetan katana ne'ebé arguida kaer hodi defende-an, arguida bele mate ka sofre konsekuénsia grave sira seluk, tanba agresaun ne'e ameasa arguida nia vida.

Rua Beco Lakateu, Aldeia Manu fuik,
Suku Colmera, Administrativu Vera Cruz
Dili Timor Leste
PoBox: 275

Telefone: 3323883 | 77295795

www.jsmp.tl

info@jsmp.tl

Facebook: www.facebook.com/timorleste.jsmp

Twitter: @JSMPtl

Iha situasaun hanesan ne'e tantu Prokuradór ka Tribunál tenke konsidera atu investiga lezadu ba krime ne'ebé nia komete hasoru arguida. Lezadu bele hetan akuzasaun ba krime tentativa omisídiu tanba lezadu buti arguida ninia kakorok no hanehan arguida ba kama leten ne'ebé bele hamosu perigu potensial ba arguida nia vida. Agresaun ne'e sériu no bele halakon arguida nia vida kuandu iha momentu ne'eba la konsege defende nia-an.

Maske nune'e, JSMP kongratula Tribunál tanba Tribunál konsidera lejítima defeza iha nia desizaun. Iha JSMP nia observaun sira antes, iha kazu balun ne'ebé envolve arguida fetu, lejítima defeza la sai nu'udar Tribunál nia konsiderasaun wainhira foti desizaun.

JSMP preokupa tebes ho situasaun ne'e, nune'e iha fulan Feveireu 2017, JSMP prodús relatóriu ida ho titulu "Fetu ne'ebé hetan violénsia doméstika no defende an iha Timor Leste".

Iha relatóriu ne'e JSMP rekomenda atu Defensór Públiku sira tenke konsidera didiak evidénsia iha kada kazu no apresenta evidénsia hotu-hotu ne'ebé sei tulun sira-nia kliente. Liuliu, karik fetu ida oho, ka koko atu oho nia parseiru íntimu iha sirkunstánsia defende-an, Defensór Públiku tenke apresenta evidénsia hotu-hotu ne'ebé relevante hodi apoia deklarasaun husi nia kliente, inklui insidente violénsia doméstika sira iha tempu pasadu ne'ebé kliente sai vítima.

Iha kazu ida ne'e, Defensór mós iha nia alegasaun argumenta katak arguida komete krime ne'e hasoru lezadu tanba lejítima defeza. Sé kuandu arguida la halo asaun ruma, nia bele mate tanba lezadu buti metin nia kakorok.

JSMP espera katak iha kazu sira tuir mai Tribunál sira hotu-hotu bele konsidera lejítima defeza nu'udar fatór importante iha sira nia desizaun.

Atu hetan informasaun klean, favor kontaktu:

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.tl
info@jsmp.tl

* http://jsmp.tl/wp-content/uploads/2012/05/Battered-women_JSMP-report-2017_TETUM.pdf